

Naalackersuisut Parisimi isumaqatigiisummi Kalaallit Nunaata nunap immikkoortuatut nangaassuteqarnerata atorunnaarsinneqarnissaanik danskit naalackersuisuinut nalunaaruteqarnissamut aamma Naalagaaffiit Peqatigiit Silap Pissusianut Isumaqatigiisutaannut, UNFCCC-mut, nalunaaruteqarnissamut peqquneqarnissaat pillugu Inatsisartut aalajangiiffigisassaattut siunnersuut.
(Nunalerinermut, Imminut Pilersornermut, Nukissiutinut Avatangiisinullu Naalackersuisoq, Kalistat Lund)

Saqqummiussassatut allakkiaq

(Nunalerinermut, Imminut Pilersornermut, Nukissiutinut Avatangiisinullu Naalackersuisoq)

Siullermeerneqarnera

Silap pissusiini allannguutit inunnit pilersinneqarsimasut nalornineeruppoq. Kingunerisai malugisalereerpagut. Marsip aallartinnerani Uummannap sullua sikugaluarpoq, anorimilli sequminneqarluni, aammalu Avannaata Qimussersuata ukioq manna Uummannami ingerlanneqarnissaa nalornissutaavoq. GEUS-imiit uppersarsarneqarpoq, nunap qeriuannartup aakkiartornera qaqqanit sisoortoqarneranut, tamatumalu nassataani tassaarsuarneranut peqputaasoq. Nunap annersaani silap allanngorarujussuarnera misigineqartarpoq. Sermeq aakkiartorpoq, ukuiusarnera sivikilliarporpoq aammalu sila unerisimanginnerulersimavoq.

Assersuutit taakku kalaallit tusagassiorfiinit ukioq manna qaammatip ataasiinnaap ingerlanerani saqqummiunneqartunit tigusaapput. Silap pissusiata allannguutai ulluinnarni inuunitsinnut, inuussutissarsionnitsinnut, kulturitsinnut isumannaassutsitsinnullu qanoq sunniuteqartut assersuutini takutinneqarpoq. Silap kissakkiartornera malillugu unammilligassat annerulerput. Iliuseqarnissaq tassangaannartumik pisariaqartinneqalerpoq.

Tamatta iliuseqarnissaq akisussaaffigaarput. Nunarsuarmit nunarsuarmit ajornartorsiutinut, nunarsuarmit suleqatigiinnikkut aamma nunani namminerni iliuseqarnikkut iluarsisarialinnik sorsugassaarput.

Naalackersuisuniit Parisimi isumaqatigiisummi akisussaaffimmik tiguserusuppugut iliuseqarusullutalu.

Issittumi allannguutit pillugit nunarsuarmit siuttut oqallinneranni Kalaallit Nunaat avataani inissisimaannarsinnaajunnaarpoq. Issittumi qanoq kiannerulersimatiginersoq, aammalu maanna iliuseqartoqangippat kissakkiartornera qanoq annertutigilissanersoq oqaluuserineqartillugu.

Pinngortitaq alianaannerpaaq avatangiisigaarput. Aamma pinngortitaq silap pissusia pillugu ajornartoornermi aaqqiissutigisinnaasatsinnik imaqarpoq. Pinngortitap nukingi ikiortigalugit silap pissusiata allanngoriartorneri unikaallatsissinnaavagut, aammalu meeqqatta pinngortitaq inuuffigalugu inuunerissaarnissaannut periarfissaqarnissaat qulakkeersinnaavarput. Pinngortitap ikiussavaatigut. 1990-ikkunnili erngup nukinganik innaallagissiorfinnik, nunatsinni gassinik silaannarmik kissakkiartortitsisunik aniatitsinitsinnik annikillitsisunik sanaartorpugut. Amerlanerusunik sanasussaavugut, aammalu Maniitsup eqqaani erngup nukinganut periarfissaqarfiusut unammillertitsiffigaagut. Tamatuma peqatigisaanik teknologii sukkasuumik ineriartorpoq, taamaalillutalu nunarsuarmit mingutsitsinitsinnik annikillitsisinnaaniarluta periarfissanik nutaanik takkutoqartuaannarpoq. Nunarsuatsinni mingutsitsinngitsunut aaqqiartuaartoqarpoq, uagullu Kalaallit Nunaanni malinnaassaagut.

Parisimi isumaqatigiisutit inuiaqatigiinnut kingunerisassai pillugit misissueqqissaarnermik suliaqartoqassasoq naalackersuisoqatigiinnermut isumaqatigiisummi allassimavoq. Misissueqqissaarnerq

maanna naammassereerpoq, tassanilu ilaalernissamut, aammalu nunarsuarmi mingutsitsinngitsunik allannguinnissamut tapersiissuteqarnissamut periarfissaqarluartugut takutinneqarpoq.

Parisimi isumaqatigiissummut ilaalerutta ineriartortitsinissamut periarfissagut annikinnerulissanngillat, kisiannili annertusaanissamut ineriartortitsinissamullu periarfissatsinnik nutaanik pissarsissaagut. Nalornineq siusinnerusukkut piusimasoq peeruppoq. Maanna kingunerisassat ilisimalersimavagut, maannalu iliuseqarnissamut immitsinnut pisussaaffilernissamut saperunnaarpugut.

Peqataanissatsinnut tapersiinnissatsinnullu piffissanngorpoq. Nakuusap Meeqqat Isummorsorfianit isumaqatigiinnissamut kajumissaaruteqarput. Meerartavut tusarnaatsigit takutillugulu, siunissaat pillugu illersoripput. Kalaallit Nunaanni inuit ikittunnguugaluarluta nunarsuarmi mingutsitsiffiunnginnerusumik siunissaqarnissamut tapersiinnissatsinnut asseqanngitsunik periarfissaqarpugut.

Taamatut oqaaseqarlunga Naalakkersuisut sinnerlugit aalajangiiffigisassatut siunnersuut Inatsisartuni suliassanngorlugu tunniuppara.